

江山風月譜
衍波詞



江山風月譜

許光治 著

中華書局

江山風月譜序

羹梅弟六歲學爲詩。有句云。年年春日好。人在百花中。及讀湯西涯少宰懷清堂集。下句在焉。因笑曰。稚子竟默符昔人耶。年十一。不復從師。余授之讀。亦間爲之。既攻舉業。雜治制義。試帖。經解。律賦。及聯散各體文。詩益少。弱冠以後。授徒爲生。又旁涉各藝事。學爲書。長於隸篆。學爲畫。長於寫生。學爲篆刻。長於工整。而不喜奇古。辨訂金石碑刻文字。下及王。易。星。平。醫。藥。無不涉獵。卽奇門。皇極。音樂。亦嘗討論之。愈以鮮暇。而吟詠固未嘗廢也。且有徵題者。徵和者。泊中年。爲人題圖。多綴以詞。至將沒數年。則又易爲散曲。顧余兄弟落筆。不甚推敲。是以稿中複字疵句。往往而有。其所好尤在樂府。於玉臺新詠。張小山小令。皆手自鈔錄。故今所存。亦曲勝於詞。詞勝於詩。然令享

大年所造或不止此。乃不謂未五十而遽沒也。平生於所作。不自收拾。惟題畫詩詞曲。而有手書之本。今得依以入梓。而詩則集亂帙成之。無復先後沒之明年。蔣君生沐爲刊之。而顧余述其端。夫弟不爲余序。而余顧爲弟序遺稿耶。噫。

咸豐六年丙辰初夏。同懷兄光清書。

江山風月譜

此據別下齋叢書
本排印初編各叢
書僅有此本

江山風月譜

菩薩蠻

海昌許光治龍華

瀟瀟一雨空庭急。落花紅墮茶煙濕。何處好風清。晚蟬三四聲。曲欄新月皎。金鴨沈煙裊。不解上簾鉤。湘筠綠界秋。

點絳脣

一霎輕寒。捲簾幾陣催花雨。團茶初煮。嫩豔浮新乳。絡緯聲聲。省識嘒蟲語。情何許。繁商急羽。閒煞殘燈蕊。

浣谿紗

鎖日輕寒滯小樓。安排簾扇下瓊鉤。鯉魚風信正飈飈。蟲爲禁涼。曉宛轉。燕因傷別話鉤。慳人天氣可憐秋。

江山風月譜

孤鸞 題友人悼亡卷子

新辭悽悼。有十載孤鸞。畫眉京兆。無上情天。貯得深愁多少。人生可憐長別。更那禁。有情人老。懊惱神傷。奉倩。更不堪重道。恨碧雲易杳。音塵渺。數廿四年來。流光草草。直恁滄桑感觸。當時懷抱。莫須斷腸遺挂。可奈他月殘鐘曉。爲問華年錦瑟。一絃絃誰膠。

菩薩蠻

翠色鴉蒜

夜寒風靜雲初咽。娟娟瀉破爐銀色。寂寞吐幽芳。山阿微有香。翠翹珠露顫。月下新妝倩。底事態輕盈。無人知小名。

蝶戀花

細雨空濛輕似霧。剪剪餘寒。又向花梢駐。滿徑飛花兼落絮。分明認得春歸路。猶有韶華千萬樹。芍藥酴醾。不放東風去。祇有芭蕉無意緒。一痕深綠窗紗妒。

卜算子

明月上窗櫺。又是三更也。整頓寒衾獨未眠。煞恐薰爐燄。
牙籤打疊殘燈下。偷得餘閒屬小詞。明日恩恩者。象管與

蝶戀花 壬辰閏重九

茱萸插了重陽後。一月光陰。佳節仍陽九。籬下菊花無恙否。再教菱
角傳杯酒。便補登高須照舊。前度青山。有約成孤負。倩得楓林紅
漸透。清霜已著三分瘦。

南歌子 十二月望日·立春·

霽雪消芹葉。輕煙暎蕙芽。未拋殘臘舊年華。斬地東風吹已遍天涯。
樹底蛾兒鬧。釵梁燕子斜。添將好景碧窗紗。恰正團圓明月照梅花。

菩薩蠻 題是色是空冊子

兩行翠袖凝香黛。色身現出優羅界。春思昵屏紗。眼中人似花。舞衫遮笑靨。壓損金泥摺。空處見因緣。爭尋曇誓天。

沁園春 送春

三月東風。九十韶光。無心逗遛。便柳絲綰去。將繁未住。榆錢埽得。欲買難留。飛絮旗亭。落花山路。唱盡驪歌未肯休。黃昏也。有無邊別緒。多少離憂。幾番花下夷猶。教花亦如人。一分愁。更多情芳草。萋萋南浦。無言春水。渺渺東流。怪底嘯鶯。不教少駐。歸去聲聲花上頭。殷勤送。過誰家酒驛。何處花郵。

浣溪紗 社日

桑柘邛邛綠未濃。連番社雨潤芳叢。一樽聊與話治聾。鍼線且教停畫閣。雞豚爭欲醉山翁。棠梨新燕又東風。

水龍吟 苦雨

亂雲何處飛來。重陰積雨。渾難歇。梅黃已過。愁露不斷。瀟瀟彌月。飛落黃河。掀翻銀浦。瀉回溟渤。早小谿陡漲。平池都滿。盡變做蛟龍窟。獨坐書窗兀兀。負閒階。幾回花發。陰潮暈石。溼光浮砌。綠苔生髮。暑盡成秋日。長似歲有何炎渴。怪鷓鴣。鳴曉罷。鴉鳩喚起。新晴難核。

水調歌頭

題乘風破浪圖

君意慕宗慤。寄興託滄溟。世間有底風浪。壯志豈能平。大叫寒潮東上。直挂雲帆西去。呼叱走風霆。坐笑井蛙子。坎窞足平生。思今古。天下事。極縱橫。丈夫生世如此。萬里等閒輕。我欲題名鼇柱。徧覽四維八極。游戲駕長鯨。濯足扶桑外。振袂上蓬瀛。

浣溪紗

立秋

怪道閒庭暑半收。西風今日數從頭。瀟瀟新雨洗新秋。綠草天涯涼冉冉。碧梧金井晚颼颼。一聲鶯鴂若爲愁。

月華清 中秋

碧宇澄清。金風蕭爽。半空雲氣都歇。萬里無塵。飛上一丸明月。問仙人可試霓裳。擬一叩廣寒宮闕。恍惚有羽衣多少。低徊蟾窟。雲外天香。秋辭。正斧罷吳剛。桂花齊發。冷露無聲。溼透玉人羅襪。快清輝此夕分明。早望裏星河半沒。咄咄。怪夜涼如水。逼人毛髮。

賀新郎 八月十六夜

明月團圓否。縱一宵孤光微缺。可堪孤負。望到中天雲彩散。但覺清輝依舊。更二八盈虧何有。怪底清寒能入骨。早桂花露溼沾衣袖。驚院落。明如晝。下階延佇裴回久。漸隔花催起。丁丁長漏。莫道良宵清興淺。對影已堪爲偶。便何必笙歌樽酒。銀漢無聲人寂寂。又闌干星影斜南斗。思好景。誰消受。

生查子 雪

迴風挾雪飛。偷入紗窗縫。知道小階前。已把梅花凍。
整頓下羅幃。防著寒威重。紙帳夜三更。準作瑤臺夢。
同雲一色垂。遮得天無縫。本是雨絲絲。忽地層霄凍。
狼藉碎瓊瑤。壓損南枝重。路也不分明。錯道梨雲夢。

漁家傲 感舊

水自分流萍自聚。人生離合渾無據。屈指韶華難少駐。芳園暮。更無
桃柳傷心樹。安得返魂香一炷。盡邀眷屬成仙去。目斷三山誰乞
與。天不許。滿腔血淚當風注。

滿庭芳 題茅屋秋聲圖

瑟瑟騷騷。蕭蕭槭槭。枝枝葉葉秋聲。一間茅屋。三尺短燈檠。著我此
間孤坐。平添得多少幽情。還更有豆花籬落。露下亂蟲鳴。清清還
切切。斷和殘雨。疏入寒更。正歐陽賦罷。宋玉愁生。不省西風何意。多

只在梧字蕉坪。遮莫是晨雞喔喔。催起又天明。

憶少年

題十年磨劍圖

恩仇身世。縱橫眼界。豪狂心跡。何當倚天外。互雄虹千尺。風雨長年時吼壁。是人間不平誰識。十年曾未試。早摩挲頭白。

蝶戀花

久雨

過盡春光知幾許。怪底芳時。只聽鳴鳩語。莫是巫山山上女。朝朝暮暮爲行雨。梅子已青蠶豆乳。有限殘春。須要天晴煦。乞取東皇相作主。明朝好約嬉春侶。

漁家傲

題柳陰垂釣圖

淺淺谿流迴碧玉。暖煙深處鷓鴣浴。雨後清陰濃一曲。看不足。釣絲斜漾春波綠。枝上柳絲吹斷續。閒情不受東風束。笑殺乾忙人世局。無榮辱。青袍不抵蓑衣綠。

應天長 戊戌除夜聞雷

銀臺絳蠟堆盤鳳。爐烟柏子香痕重。傾綠蟻。開春鬢。一年忙盡今宵空。雨聲長。雲意凍。何事輕雷先動。年華要人相送。故教驚好夢。

西平樂慢 題金陀懷古卷子

舊日林泉舊家池館。倦圃猶賸荒莊。南渡風流。竭今難問。山川空說存亡。問何處故宮禾黍。何處諸陵松柏。祇應一角名園。巋然便似靈光。追念金陀舊事。增感慨殘劫冷紅羊。古池喬木。平臺蔓草。楊柳灣頭。徑未全荒。禁不得閒坊暮色。古寺昏鐘。昔日山河已改。遊客來時。柳葉槐花自夕陽。風景可憐。一彎流水。一角孤亭。一陣昏鴉。一抹寒煙。畫圖爲寫滄桑。

蜨戀花 題畫

十字新詞翻曲譜。永夜幽窗。挑盡寒燈炷。只與卷中人共語。癡情拚

作傷心侶。安得離魂同情女。瘦影亭亭。飛向郎邊去。紅淚偷彈無覓處。幾聲葉上梧桐雨。

踏莎行 春晴

百老纔過。重三未屆。郊原早有人挑菜。一春不放海棠顛。踏青心事都成債。燕麥多情。鶯花無賴。今年索被東風害。天公須要作春陰。如何賤把韶光賣。

眉峯碧 題觀弈圖

山淺蛾眉綠。松老龍鱗蹙。抖擻塵忙獨自閒。時倚樹看飛瀑。得失成蕉鹿。勝負憐蠻觸。世事今從局外看。任教兒輩閒翻局。

漁家傲 題水邨圖

天水風流餘梗概。水邨煙景分明在。垂柳蕭疏黃一帶。閒意態。墨痕認是吳興派。波影天光低似黛。幾家茅屋斜陽外。可有鱸魚隨處

賣。渾自怪。此生未了鷗波債。

望江南

芳事晚。爲是峭寒纔。玉茗花輕紅似醉。江梅蘂小綠成堆。都向北風開。

山花子

寫秋葵芙蓉

浦口朝來曉露濃。新黃相閒出輕紅。都是秋江江上景。一叢叢。野老醉餘金盞側。美人行。困粉光融。裁破剡谿牋一幅。寫西風。

水調歌頭

紫峽山莊探梅

結伴討春去。春色在梅花。正逢天日新霽。午影卓金鴉。便喚扁舟徑渡。渡到東山山麓。門徑竹籬遮。何必羅浮夜。沽酒野人家。君看取。香暗淡。影橫斜。花神知我來此。先與放韶華。更上高樓四眺。更下高樓一望。煙水渺無涯。待到中秋月。我欲喚浮槎。

眉峰碧

題沈竹賓梅花美人

香霧昏黃後。初月明如晝。揀得江梅不忍攀。祇低把花枝顫。釵股濃雲溜。裙摺微風皺。莫與東風比較春。幾分輪與東風瘦。

滿庭芳

題紫峽山莊依雲堂

鹿眼籬疎。虎皮牆矮。邨前遙指山莊。負山臨水。占取好風光。花竹居然和氣。添機杼。草木文章。春風暖。新巢乍定。紅雨燕泥香。徜徉三徑畔。煙華不少。風月難量。喜板輿奉母。愛日方長。高下亭池樓閣。曲欄更小樹迴廊。烏啼夜。情深反哺。介壽上高堂。

好事近

詠鬢邊花。同張子祥韻。

膩雪擁銀翹。恰愛晚來香透。玉鏡臺邊初整。壓雙鬟雲覆。醉來山枕小橫陳。釵重半邊溜。可惜夜闌開盡。又卸妝時候。

惜黃花

竹籬茅舍圖